

HESTAMANNAFÉLAGIÐ SINDRI

ÆSKULÝÐSSKÝRSLA 2016



Ársskýrsla æskulýðsnefndar hmf. Sindra 2016

Inngangur:

Æskulýðsstarf hestamannafélagsins Sindra hefur um nokkurra ára skeið verið mjög metnaðarfullt og hefur nefndin lagt mikið upp úr því að öll félagsbörn frá 3ja ára til 18 ára finni sér viðburð við hæfi. Á marga af þessum viðburðum er ekki þörf á að koma með hesta enda horfum við til nýliðunar og viljum gefa börnum sem ekki eiga hross, en hafa mikinn áhuga, tækifæri á að vera með í sportinu og fá að njóta félagsskaparins og viðburðanna. Stór liður í þessu eru reiðskólar Sindra sem hafa verið starfræktir af æskulýðsnefnd Sindra í fjölda ára en þar gefst öllum börnum kostur á að njóta samvista og útreiðatúra með hestunum sem félagið útvegar.

Hér verður greint frá helstu viðburðum sem æskulýðsnefnd hestamannafélagsins Sindra stóð fyrir starfsárið 2016.

Í æskulýðsnefnd 2016 eru:

Vilborg Smáradóttir, form.

Hjördís Rut Jónsdóttir

Sólveig Eyvindsdóttir

Þorsteinn Björn Einarsson

Þuríður Inga Gísladóttir

Viðburðir 2016:

Pollapepp

Föstudaginn 29. Janúar buðum við í hesthúsið til okkar börnum 9 ára og yngri. 5 börn mættu og ræddum við fyrst svolítið um hestana og fengum þau til að segja okkur hvort þau ættu sjálf hest eða þekktu hest. Því næst gengum við um hesthúsið og sögðum frá hverjum og einum hesti og spurðum út í litinn á viðkomandi hesti, það varð mjög fróðlegt spjall. Eftir spjallið var farið í nokkra leiki fyrir utan hesthús og öllum þar á eftir boðið á bak stuttan teyMINGartúr, eftir reiðtúrinn fengu allir súkkulaðiköku og svala og afhenda nýju hestabókina.



Æfingabúðir

Æfingabúðir Sindra voru að þessu sinni haldnar í Austurkoti í byrjun febrúar en þar sem við höfum hvorki yfir að ráða reiðhöll, góðri aðstöðu til kennslu hópa, né heldur aðgang að lærðum kennurum í næsta nágrenni, höfum við undanfarin ár sett upp æfingabúðir, þar sem farið er með hross og börn eitthvert heila helgi. Í ár var Hugrún Jóhannsdóttir kennari og tók hún einstaklega vel á móti okkur krökkunum, dagskráin var ströng alla helgina en á kvöldin var þó hægt að slaka á í notarlegu einbýlishúsi á Selfossi sem við fengum leigt. Meðal þess sem gert var í æfingabúðum var eftirfarandi: Kennsla á hverjum degi auk fyrirlestrar, farið út að borða, farið í bíó, spilað og spjallað, farið í sund og göngutúra. Æfingabúðirnar eru í algjöru uppáhaldi hjá flestum og er ótrúlegt að sjá hversu mikið krakkarnir læra á þessum stutta tíma.



Kennsla í vetur

Eftirfylgni við æfingabúðirnar okkar var reiðkennsla í þrjú skipti hjá Hugrúnu með c.a. 3 vikna millibili, en með því móti gat Hugrún fylgst með krökkunum og leiðbeint þeim áfram um ýmis atriði sem betur máttu fara.

Páskabingó

Um páskana stóð æskulýðsnefnd fyrir árlegu páskabingói sem opið var öllum. Vinningar voru auðvitað páskaegg enda páskadagur á næsta leiti. Bingóið var liður í fjáröflun æskulýðsnefndar, var það vel sótt og tókst ljómandi vel.

Æskulýðsreiðtúrinn

Æskulýðsreiðtúrinn var farinn í blíðskaparveðri þann 28. apríl. hressir krakkar mættu í reiðtúrinn með vel snyrta hesta sína. Við dóluðum okkur rúmlega klukkutímatúr með góðu stoppi í grænni laut, þar sem hestar fengu að narta og knapar fengu hið sígilda prince póló og svala.

Reiðskóli Sindra 2016

Reiðskólar Sindra voru haldnir að vanda í Vík og í Skálakoti þann 30.- 4. júní. Öllum börnum frá 6 ára aldri gefst kostur á að taka þátt í reiðskólum Sindra og njóta stunda með hestunum sem góðfúslega eru lánaðir árlega til reiðskólanna af félagsmönnum hestamannafélagsins Sindra. Samtals voru um 70 krakkar þátttakendur í ár og er stærstur hluti þeirra börn sem ekki hafa aðgang að hrossum að öðrum kosti. Það má því nærri geta hversu gefandi og skemmtileg þessi vika er, þar sem þakklát börn fá þann draum sinn uppfylltan að hafa aðgang að hrossum í einn klukkutíma á dag í heila viku.



Reiðskólasýning 2016

Það hefur verið til síðs að fagna lokum reiðskólans með reiðskólasýningu. Þar gefst krökkunum sem verið hafa í skólanum færi á að sýna foreldrum og öðrum hversu klár þau eru orðin eftir vikuna. Hver og einn hópur fékk að sýna sitt atriði og voru sýningarnar allt frá því að vera sýning 6 ára barna á hæfileikum sínum til að stýra og stöðva hrossunum upp í flókna sýningu og jafnvel stólaleik. Sýningin tókst að vanda með eindæmum vel og það voru stoltir foreldrar sem horfðu á krakkana sýna listir sínar.



Þátttaka á mótum

Krakkarnir okkar eru mjög virkir þátttakendur á mótum hestamannafélagsins. Þau tóku m.a. þátt hér heima í:

Vetrarmóti Sindra og Skeiðvallar

Firmakeppni Sindra

Hestaþingi Sindra

Við áttum svo einnig nokkra fulltrúa á:

Íþróttamóti Sleipnis

Íslandsmóti yngri flokka

Landsmóti 2018

Suðurlandsmóti yngri flokka á Hellu

Hestaþingi Kóps



Uppskeruhátíð

Að vanda verður uppskeruhátíð æskulýðsins í október. Þar verður framreidd tveggja rétta máltíð, veitt tilnefning efnilegasta knapa ársins, veittar viðurkenningar fyrir árangur á hestaþingi Sindra í ár og haldnar umræður um starf æskulýðsnefndarinnar í ár og hvernig krakkarnir sjá fyrir sér starf næsta ár.

Með kveðju

Æskulýðsnefnd hestamannafélagsins Sindra 2016